

REGIONAL NEWS

HEADLINES:-

1. Ministry of Home Affairs chuan Myanmar raltlante biometric leh biographic data lakkhawm kalpui zawhfel hun tur bituk chu thla ruk atan a pawtsei.
2. Thla li chauh a upa Chakma Autonomous District Council (CADC) MNF sorkar chu a nging chho mek a, Sorkar thar ZPM kaihhruai a pian theih na'n hmalakna kalpui mek a ni.
3. Jal Jeevan Mission (JJM) hnuaiah Mamit district chung khaw hrang hrangah hmalak mek a ni.
4. Prime Minister Narendra Modi-a hovin ramchung hmun hrang hrangah faina beihpui, Swachhata Hi Seva Abhiyan neih a ni

<><><>

MYANMAR REFUGEES

Mizoram sorkarin Myanmar raltlante biometric leh biographic data lakkhawm rih loh ni se tih thutlukna a siam tuk khan Ministry of Home Affairs MHA chuan he thil kalpui zawhfel hun tur bituk chu thla ruk atan a pawtsei.

MHA chuan Mizoram leh Manipur-a Myanmar raltlante biometric leh biography data lakkhawm hna, September thla chungza zawh fel tura a lo tih tawh chu nakum March thla thleng atan a pawtsei a. Hei hi Manipur tualchung buaina vang leh Mizorama assembly inthlanpui a awm dawn vang ni a hriat a ni. MHA-in biometric leh biographic data lakkhawm hna thawk tura tih hi Mizoram sorkar hnathawkte an inpeih fel tawh na a, Nilaini a Council of Minister thukhawm chuan kalpui rih loh ni se tiin thutlukna a siam a. Council of Minister inkhawm zawh hnu a chanchinbumite'n an kawmna-ah Information and Public Relations Minister Pu Lalruatkima chuan Mizorama Myanmar raltlan sing thum chuang awm mekte mit naute thlalak, an kutzia lak leh an chanchin kimchang lakhawm tura sorkar laipui-in a rawn tih chu Council of Ministers thukhawm chuan tun dinhmunah kalpui rih loh ni se an tih thu a sawi a. Tunah hian inthlanpui lo awm tur avangin sorkar hnathawkte an buai em em a, inthlan puan a nih hnu pheih chuan khaw dang hawi hman lova hna an thawh a ngaih dawn avangin he hna thawh tura Ministry of Home Affairs in a rawn tih hi kalpui rih loh ni se, an ti a ni a ti.

Hei bakah hian Myanmar atanga rawn raltlante chu Mizoram amite thisen zawmpui leh unau an nih avangin an biometric leh biographic data lo lak chu inthliarhranna anga a lan theih avangin tun dinhmunah chuan kalpui a tul rih lo an ti a ni. Pu Lalruatkima chuan Myanmar raltlante tan hian Sorkar laipui-ah anmahni enkawl na tur vawi tam tak dil a ni chungin a harsa hle a ni a ti. Chuti chung chung chuan unau na na na chu theih ang anga lo tuamhlawmin naupang sikul kalrual a sang tel chuan Mizoram leh khaw zir chunzawmin zir laibu a thlawna pek bakah chawchhun pawh Mizoram chungza zir laite ang bawkin a thlawnin an dawng ve a ni, a ti.

<><><>

CLEANLINESS

Ram chung hmun dangte'n ropui taka ram pum huap faina beihpui thlakna ni (nationwide cleanliness drive) vawiina an huaihawt chu Pathianni a nih avangin Mizoram sorkar chuan a hmang ve lo.

Hemi chungchangah Chief Minister Pu Zoramthanga chuan a Instagram account-a a tarlan danin. India Hnampa Mahatma Gandhi piancham October ni 2 puala Faina Ni hman thin chu ram pumah hlawhtling taka hman a nih theih na'n Sorkar laipui chuan Faina Ni beihpui thlak chu September 15 atanga October 2 thleng neih turin ruahmanna a siam a. Amaherawhchu October ni 1 hi Pathianni (Sunday) a nih avangin Kohhran mite tan he ni-ah hian faina beihpui thlak a remchang dawn lova. Chuvangin Kohhran member-te tel vek theih nan a tuk October ni 2 atangin Faina beihpui thlak hi kalpui tura ruahmanna siam tur a ni a. Hei hi Faina Hapta inthanna a ni nghal bawk dawn a ni, a ti. Pathianni ni lova Thawhtanni, Mahatma Gandhi piancham October ni 2 a he hun hman a nih tur thu hi UD and PA department pawhin an chhuah a ni. Hemi hmalam hian Mizoram Kohhran Hruaitute Committee (MKHC) chuan Pathianni a faina beihpui thlak chu Mizoramah chuan ti ve lo turin Chief Minister hi an lo ngen tawh a. Central YMA pawhin Kristiante ni serh Pathianni kher sorkar thil pawimawh buatsaih chu tha an tih loh thu an lo sawi tawh bawk a ni.

Hetih lai hian Gandhi Jayanti puala ram pum huapa Faina Hnatlang zawmin, larsap Dr. Hari Babu Kambhampati leh Raj Bhavan officer leh thawktu dangte chu vawiin chawhma khan an hnatlang a ,Swachhata Pakhwada - Swachhata Hi Seva (SHS) 2023 hnuaia hnatlangah hian larsap leh Raj Bhavan a hnathawk tute chuan Raj Bhavan leh Old MLA Hostel inkara Kawngpui te an phiat fai a ni. Sorkar laipui hnuaia institution leh pisa thenkhat bakah sipai lamte chuan he ni hi an hmang ni a thudawn a ni a. National Institute of Technology (NIT) zirtirtu leh zirlaite chu Durtlang vengah khawlai tihfai hna thawkin an hnatlang a ni. Chief Secretary Dr Renu Sharma hovin Assam Rifles lammual-ah leh Dawrpui-ah Assam Rifles leh midangte'n he ni hi an hmang bawk a. Khawlai tihfai hnatlangah hian Aizawl district bawrhsap Pi Nazuk Kumar pawh a tel a ni.

<><><>

CADC

Thla li chauh a upa Chakma Autonomous District Council (CADC) MNF sorkar chu a nghing chho mek a, Sorkar thar ZPM kaihhruai a pian theih na'n hmalakna kalpui mek a ni.

Lawngtlaia kan Corr Lalnggheta Ralte thu a dawn danin CADC a MNF Legislature Party Leader, CEM Pu Rasik Mohan Chakma leh a thawhpui MDC 17 te chuan ZPM zawm tumin thil an kalpui mek a, tunkar hian ZPM Gen Hqrs hruaitute Chawngte ah kalin CADC ah ZPM Sorkar a piantheih nan a hmawrbawk fel an tum a. ZPM Working President Pu K. Sapdanga'n Nilaini, khian an party-ah a lawmlut dawn ni a thudawn a ni. Kumin May thla a CADC inthlanpui-ah khan Seat 20 awmna CADC ah hian MNF chuan bial 10 la in, BJP leh INC ten Seat 5 ve ve an chang a. BJP leh INC atanga MNF thlawptute nen CADC ah hian Pu Rashik Mohan Chakma kaihhruai MNF Sorkar din niin, kumin May 25 khan Pu Rashik Mohan Chakma chu CEM atan lakluh a ni.

Thu dawnna pakhat a sawi dan chuan tun Assembly inthlanpui lo awm turah Tuichawng biala MNF-in an dintir loh avangin Pu Rasik Mohan Chakma hi a lungawi lova, a hote nen hian ZPM zawm an titlu ta a. Tuichawng bialah hian

MNF chuan Pu Durjya Dhan Chakma chu an party candidate turin an ruat fel tawh a ni

<><><>

JJM MAMIT

Thingtlang khua ten tui thianghlim in tur hnianghnar tak an neih theihna tur a central sorkar hmalakna Jal Jeevan Mission (JJM) hnuaiah Mamit district chhung khaw hrang hrangah hmalak mek a ni.

PHE WATSAN Division EE Pi Helen Saibuangi chuan JJM hi Mamit district ah pawh chak tak a hmalak chhoh mek a ni ati a, kum 2019 - 2020 chhungin ruahmanna 28 (khaw 28 ah), kum 2020 - 2021 chhungin ruahmanna 18 (khaw 18 ah), kum 2021 - 2023 chhungin ruahmanna 35 (khaw 35) ah te kalpui a nih thu sawiin tun dinhmunah Mamit district chhung khaw 81-ah kalpui a ni a, chu'ng zinga khaw 46 ah hna zawh tawh niin khaw 35 ah thawh mek a nih thu a sawi.

JJM hi Central sorkar in thingtlang mi ten tui hnianghnar tak tui thianghlim in tur an neih theihna tur a hmalakna niin October ni 2, 2019 atang khan kalpui tan a ni a, nakum March ni 31, 2024 a zawh hman tur a ruahman a ni.

<><><>

DAY OF OLDER PERSONS

Vawiin hi Khawvel pumah Upa te ni a nih angin Mizo Upa Pawl Electric veng Lunglei chuan he Ni hmangtu zawng zawng te chibai bukna thuchhuah an siam. Kumin upa te ni hi Pathianni a a tlak avangin MUP Lunglei chuan a hranpa a hmang lovin, nimin khan Unit thenkhat chuan an hmang a ni. Kum Upate duhsakna hi Civil Hospital Lunglei chuan Med. Suptd hmalakna in Inentir tur hming ziak naah kum upa te tan Counter an siam a, Mizoram a a hmasa ber atan March ni 7, 2017 khan Geriatric Ward siam a ni a, kum 60 chin chunglam te Civil Hospital-a damlohna avanga awm te chu an tan Ward hran siamin khum 8 dah a ni. Hei bakah SBI Lunglei Main Branch chuan kum upate tan Counter hranpa an siam sak bawk.

Kum Upate hamthatna atan hian Senior Citizen Card chu DC Office - ah siam tirin MST Bus-ah man chanve chawiin a zin theih a, hmeichhia kum 60 chin chunglam tan pawh Directorate of Social Welfare & Tribal Affairs-ah Card siam tirin MST bus-ah a thlawnin a zin theih a ni. Hei bakah hian Directorate of Social Welfare & Tribal Affairs - ah Card siam tirin India ram thlawhna-ah a man chanve chawiin a zin theih bawk a ni.

<><><>

SWACCHATA HI SEVA ABHIYAN

Prime Minister Narendra Modi-a hovin vawiin khan ramchhung hmun hrang hrangah faina beihpui, Swachhata Hi Seva Abhiyan thlak a ni a, Pu Modi-a pawh fitness lama milar, Ankit Baiyanpuriya-a nen hnatlanga thawk chhuakin bawlhhlawh an chhar fai a ni.

Puan tawh angin, Prime Minister Modi-a hian vawiin chawhma dar 10-ah darkar khat chhung ram pumah a huhova faina beihpui hnatlanga thawk chhuak vek turin Pathianni kaltaa Mann Ki Baat hun a hmanna-ah ram mipuite a lo ngen tawh a, Ek Tareekh Ek Ghanta Ek Saath tia vuah hnatlangpui-ah hian bazarna hmun, rel kawng, lui, zin mite tlawh thin hmunhma leh sakhaw hmun pawimawhte thianfaiin mipui thahnem tak an thawk chhuak a ni.